

Ministar odbrane BiH imenovan na funkciju ko-predsjedavajućeg Komisije za reformu odbrane (DRC)

Visoki predstavnik, Paddy Ashdown je danas imenovao ministra odbrane BiH, gospodina Nikolu Radovanovića na funkciju ko-predsjedavajućeg Komisije za reformu odbrane (DRC). Visoki predstavnik je izvršio ovo imenovanje na osnovu preporuke koju mu je dao predsjedavajući ove Komisije, gospodin James Locher.

Visoki predstavnik je postupio na osnovu tog prijedloga i istakao da "organi vlasti BiH imaju krajnju odgovornost za provođenje preporuka DRC-a, a ta se činjenica ogleda i u ovom imenovanju, dok će DRC sa svojim međunarodnim predstavnicima nastaviti s radom kako bi pomogao i pratio ostvarivanje napretka u okviru ove reforme."

Ministar Radovanović ima proaktivan pristup reformi odbrane i u tom smislu se pokazao kao značajna pokretačka snaga koja je utjecala na postizanje brzih i konkretnih rezultata prije Istambulskog samita NATO-a zakazanog za juni ove godine. Imenovanje ministra Radovanovića na funkciju ko-predsjedavajućeg DRC-a ukazuje na sve značajniju ulogu bh. organa vlasti u planiranju aktivnosti za buduću reformu sektora odbrane, što će ovu zemlju približiti euro-atlanskim institucijama.

Visoki predstavnik je 3. februara 2004. godine produžio mandat Komisije za reformu odbrane i njenog predsjedavajućeg, James Lochera. Ovo produženje mandata će Bosni i Hercegovini pomoći da ostvari istinski napredak u provođenju reforme odbrane koja će joj omogućiti da ispuni uvjete za članstvo u NATO Programu "Partnerstvo za mir".

Visoki predstavnik je takođe odobrio prijedlog predsjedavajućeg Lochera da u DRC imenuje i poslanike koji su članovi Zajedničke komisije za sigurnost i odbranu Parlamentarne skupštine BiH, gospodina Branka Zrno i gospodina Šefika Džaferovića. Visoki predstavnik je pozdravio i namjeru predsjedavajućeg Lochera da imenuje zapovjednika operativne komande, iz reda hrvatskog naroda, na funkciju statutarog vojnog savjetnika DRC-a.